

## 香港電器工程商會會慶暨第二十三屆理事就職典禮

### 機電工程署署長薛永恒太平紳士致辭

#### 「青年・創科・建未來」

韋業堅會長、區達基主席、立法會盧偉國議員、各位香港電器工程商會嘅會友、各位嘉賓：

大家好！我非常高興出席今晚的盛會，與各位一齊慶祝香港電器工程商會周年會慶，並見證新一屆理事就職。首先，我衷心恭賀韋會長、區主席和各位理事。香港電器工程商會自 1976 年成立以來，一直致力凝聚電業承辦商的力量，攜手推動電業界發展，例如積極參與海外會議及展覽，推廣香港電業界；舉辦技術研討會，提高業界的技術水平；成立教育基金，比有需要的職訓學生得到經濟上的支援和鼓勵。商會又一直擔當政府與電業界之間的溝通橋樑，同電業工會一齊，支持機電署提升香港電力安全，貢獻良多。我藉這個機會代表香港特區政府衷心感謝商會多年來為香港電業界作出的努力及貢獻。我亦留意到商會近年努力向年輕一代推廣機電行業的發展，商會代表多次走進校園與學生溝通和交流，透過職業講座推廣機電行業，加深學生對行業的認識。今晚亦有參與職業講座的學校校長有出席今晚的宴會，我在此感謝學校和商會幫助學生了解機電行業，協助他們預早進行職業規劃。

比我係到幫香港的機電業做個植入式嘅宣傳，香港的機電業可謂機遇處處，前景無限。政務司司長及發展局局長都曾形容機電業是百業的「基本盤」，對香港社會、經濟和民生有舉足輕重的地位。而可靠及穩定的電力供應更是促進香港發展的重要一環。政府預計在未來十年大型基建項目的總投資額會超過一萬億元，勢必為機電工程從業員提供大量發展空間。所以我積極鼓勵在座嘅電業前輩給年青人多啲嘅培訓機會，鼓勵他們入行，為業界注入新動力。

我哋機電業嘅年青人亦唔會令大家失望嘅，看看剛在今年八月在俄羅斯喀山舉行的世界技能大賽，香港的年青選手經過嚴格考核和訓練，代表香港與來自 60 多個國家及地區的過千名選手切磋技能。香港雖然只是彈丸之地，佔全球人口不足百分之零點一，但我哋嘅年青選手在電氣安裝和空調製冷都取得優勝獎，在眾多頂尖參賽者中脫穎而出，為港爭光，亦證明香港的機電業技術達到世界級水平。世界經濟論壇剛剛公布最新全球競爭力排名，香港位列第三，當中 12 項指標，包括宏觀經濟穩定性、健康、金融系統及產品市場等項目高踞榜首；在基礎設施指標方面，近年來也穩佔前列位置，今年排行第三，評分準則包括供電系統及鐵路運輸等設施，呢個排名，亦都反映香港機電業嘅貢獻和超卓技術水平。不過，另一方面，在創新能力指標，香港就唔係咁突出了，僅排名第二十六。所以，我們要更加努力積極推動創新科技發展，我深深感受到，創新嘅科技好多都係同機電有關，譬如無人機 Drone、物聯網 IoT、遙控監測等等，本身都係機電設施同產品，同機電業息息相關，我們機電業絕對有能力透過不斷改進和廣泛應用創新科技，提高行業的服務質素和效率。政府會努力支持大家係創新嘅發展，例如政府於去年撥款 10 億元成立「建造業創新及科技基金」，目的就係鼓勵業界廣泛採用創新建築方法及科技，促進生產力、提高建造質素，並加強從業員掌握科技的能力。我們機電署新成立嘅網上創新協作平台 Innoportal 和創科專區 Innozone，都是為落實政府作為推廣者和促成者嘅角色，將創科機構、政府部門和機電業連繫起來，為推動香港嘅創新發展加強合作，透過廣泛應用創新科技，提高行業的服務質素和效率。

各位朋友，香港能躋身世界級大都會之列，得來不易，是社會各界用心經營、共同努力的成果。

近期嘅社會事件，相信大家都會和我一樣，既擔心、亦痛心，睇到事件對社會民生、經濟嘅影響，大家都可能會問，我哋可以做啲咩嘢，去幫助改變現有嘅困局，喺到我同大家做個分享，我覺得最重要係要把擔心、痛心這兩個心，轉化成另外兩個心：信心同關心。我哋要對香港有信心，

過去幾十年，就算面對不少風浪，但因為香港人嘅勤勞，堅毅；同時亦受惠於國家嘅發展和對香港嘅支持，我哋香港呢個彈丸之地，在多方向可以响世界名列前茅，所以我哋要對自己有信心，只要大家努力不懈，香港一定可以同樣克服今次嘅挑戰。另外一個心，就係關心。香港係我哋嘅家，今日嘅香港，我哋有份努力建設，成就今日香港。係呢個香港社會面對艱難挑戰嘅時候，我哋要多發聲、多參與，堅守自己崗位。最後，我期盼繼續與商會及在座各位同心同行，共建香港更美好的未來。亦謹祝商會會務蒸蒸日上、再創高峰，在座各位身體健康、工作順利！多謝大家。

2019年11月22日